



Republika e Kosovës – Republika Kosova
Paneli Zgjedhor për Ankesa dhe Parashtrësia
Izborni Panel za Žalbe i Predstavke

A.nr.439/2021

Paneli Zgjedhor për Ankesa dhe Parashtrësia (PZAP), në panelin e përbërë nga gjyqtarët: Ferki Xhaferi kryesues, Adnan Konushevcu dhe Faton Ademi anëtarë, me zyrtarin ligjor Faton Xhaqkaj, duke vendosur lidhur me ankesën e subjekteve politike Lidhja Demokratike e Kosovës (LDK), me seli në Prishtinë, dhe Partia Demokratike e Kosovës (PDK), me seli në Prishtinë, paraqitur kundër subjektit politik Lëvizja Vetëvendosje, me seli në Prishtinë, për shkak të Shkeljes së Kodit të Mirësjelljes, Thyerje e Heshtjes Zgjedhore, për Zgjedhjet e Parakohshme për Kuvendin e Republikës së Kosovës të datës 14.02.2021, në seancën e panelit të mbajtur me datë 16.02.2021, mori këtë:

V E N D I M

PRANOHEN të bazuara ankesat e identifikuara me numër Anr.439/2021 dhe Anr. 470/2021, të dyja të datës 14.20.2021 të paraqitura nga subjektet politike Lidhja Demokratike e Kosovës (LDK), me seli në Prishtinë dhe Partia Demokratike e Kosovës (PDK), me seli në Prishtinë, ndërsa subjektit politik Lëvizja Vetëvendosje, me seli në Prishtinë, i **SHQIPTOHET** gjobë në lartësi prej 20,000.00 euro, (njëzetë mijë), në emër të thyerjes së heshtjes zgjedhore mbajtje e tubimit, për Zgjedhjet e Parakohshme për Kuvendin e Republikës së Kosovës të datës 14.02.2021. Detyrohet subjekti politik Lëvizja Vetëvendosje që gjobën e shqiptuar ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të dënimit shtesë.

A r s y e t i m

PZAP-i, më datën 14.02.2021, ka pranuar ankesat Anr.439/2021, nga subjekti politik Lidhja Demokratike e Kosovës (LDK), dhe ankesën Anr.470/2021 nga Partia Demokratike e Kosovës (PDK).

Në ankesën Anr.439/2021 të Lidhjes Demokratike të Kosovës pretendohet se gjatë ditës së heshtjes zgjedhore subjekti politik Lëvizja Vetëvendosje ka mbajtur tubim politik për të cilën si provë kanë bashkangjitur CD, ku dëgjohet dhe shihet video dhe audio – incizimi. Duke vepruar kështu subjekti politik Lëvizja Vetëvendosje ka bërë shkelje të Ligjit nr.03/L-073, për zgjedhjet e përgjithshme. Gjithashtu ka theksuar se Lidhja Demokratike e Kosovës për shkeljen e supozuar është njoftuar me datë 14.02.2021, andaj në afatin e paraparë brenda 24 orëve ka parashtruar ankesë në PZAP. Ka propozuar që subjektit Lëvizja Vetëvendosje të aplikohen dispozitat për Kategorizimin e sanksioneve të Gjobave.

Subjekti politik Partia Demokratike e Kosovës (PDK) në ankesën e tyre Anr.470/2021 pretendojnë se me datën 13.02.2021 rreth orës 13:00 Lëvizja Vetëvendosje ka mbajtur një takim me qytetarë në ambientet e hotel “Afa” në Prishtinë, në këtë tubim me qytetarë kanë marrë pjesë anëtarë të strukturave udhëheqëse të LVV-së, përfshirë edhe kryetarin e këtij subjekti, Albin Kurti, Me këtë parashtruesi i ankesës pretendon se LVV ka shkelur dispozitat

ligjore, përkatësisht të rregullës zgjedhore Nr.13/2013. Si provë kanë bashkangjitur një CD me përmbajtje të videos.

PZAP-i, në kuptim të nenit 7 paragrafi 1, të Rregullave dhe Procedurave të PZAP-it, e ka njoftuar subjektin politik Lëvizja Vetëvendosje, për ankesën që është bërë ndaj saj dhe ka kërkuar që të përgjigjet ndaj ankesës në fjalë.

Në përgjigjet e ankesave Lëvizja Vetëvendosje, thekson se nga provat e bashkangjitura (audio - video - incizimi), në asnjë mënyrë parashtuesit e ankesës nuk e kanë argumentuar pretendimin e tyre të paraqitur në ankesë. Subjekti politik Lëvizja Vetëvendosje, ditën e heshtjes zgjedhore nuk ka organizuar asnjë tubim politik. Pamjet filmike të paraqitura ne portalin “Insajder”, në të cilat parashtuesi i ankesës i mbështet thëniet e ankesës nuk janë pamje të incizuara në selinë e Lëvizjes Vetëvendosje. Nga këto pamje me zë dhe figurë mund të konstatohet se ato janë marr nga një sall hoteli ku shihen një grup personash por assesi nuk mund të konstatohet se njerëzit që shihen brenda në këto pamje janë organizuar nga Lëvizja Vetëvendosje dhe aq më pak në një tubim politik. Ka propozuar që të ankesat të refuzohen si të pa bazuara.

PZAP-i, pasi që shqyrtoi dhe analizoi shkresat e lëndës, gjeti se:

Ankesa është e bazuar

Paneli, paraprakisht ka vlerësuar se ankesat: Anr.439/2021 dhe Anr.470/2021, të dyja të datës 14.02.2021, të cilat për nga përmbajtja janë të njëjta, për nga natyra e shkeljes së pretenduar janë të njëjta, paraqitës të ankesave janë subjekti politik Lidhja Demokratike e Kosovës (LD) dhe Partia Demokratike e Kosovës (PDK), dhe po ashtu të njëjtat janë paraqitur kundër subjektit të njëjtë politik, Lëvizja Vetëvendosje, prandaj Paneli, bazuar në nenin 8 paragrafi 3 të Rregullave dhe Procedurave Nr.02/2015, të PZAP-it, në të cilën përcaktohet se: *“Me qëllim të lehtësimit të shqyrtimit të ankesave kryesuesi i panelit vendimmarrës mund të vendos ta bëjë bashkimin e ankesave që përmbajnë në vete çështje të ngjashme dhe se ato ankesa të trajtohen me një vendim”, andaj paneli edhe bëri bashkimin e ankesave dhe për të njëjtat vendosi me një vendim, si në dispozitiv të këtij vendimi.*

Paneli, pas shikimit dhe vlerësimit të pretendimeve ankimore, provave që gjenden në shkresat e lëndës, CD-së, si dhe përgjigjes në ankesë, erdhi në përfundim se ankesa është e bazuar. Nga prova e bashkangjitur me ankesë CD, shihet qartë se subjekti politik Lëvizja Vetëvendosje ka thyer heshtjen zgjedhore duke mbajtur tubim politik.

Në raport me pretendimet e subjektit politik Lëvizja Vetëvendosje të parashtuara në përgjigjet e ankesave, se pamjet e bashkangjitura nuk janë pamje të xhiruara në selinë e Lëvizjes Vetëvendosje, këtë pretendim Paneli e vlerësoi si jo relevant dhe pa ndikim në vendosje.

Në rastin konkret nuk ka rëndësi se ku mbahet tubimi, e rëndësishme është se kur është mbajtur takimi, numri i personave që kanë prezantuar pra masa, pastaj nën organizimin e kujt është bërë takimi, dhe nga video – incizimi shihet qartë se nga po i njëjti subjekt është organizuar ky tubim, gjë që me këtë veprim ka bërë shkelje të heshtjes zgjedhore.

Përveç kësaj edhe sikur takimi në fjalë mos të ishte organizuar nga subjekti VV, kjo nuk e përjashton përgjegjësinë e subjektit, meqenëse pjesëmarrësit në këtë takim identifikohen me shenja dhe llogo se janë aktivistë të subjektit në fjalë.

Paneli i shqyrtoi edhe pretendimet tjera të subjektit LVV, por nuk gjeti asnjë argument apo provë bindëse që dëshmon së audio – incizimi, nuk ka të bëjë me këtë subjekt.

Nga zëri që dëgjohej nga pjesëmarrësit në takim, masa në momente të caktuara elektrizohet dhe fillon të brohoras emrin e kryetarit të subjektit politik Lëvizja Vetëvendosje Albi Kurti, gjë që pa dyshim vërteton faktin se organizimi ka qenë nën patronatin e subjektit VV, dhe në takim ka qenë edhe kryetari i subjektit politik dhe kjo përbën shkelje të heshtjes zgjedhore por përsa e shkeljes është më e rëndë, pasi subjekti në fjalë është i njoftuar me rregullat që e karakterizojnë procesin zgjedhor dhe detyrimet e subjekteve politike se si duhet të sillen gjatë procesit.

Me nenin 6 paragrafi 2 i Rregullores Nr.01/2012, për Kategorizimin e Sanksioneve dhe Gjobave të PZAP-it, përcaktohet se: *“Në qoftë se subjekti politik, mbështetësit ose kandidatët e tij bëjnë fushatë në çfarëdo mënyre njëzetekatër (24) orë para hapjes së Qendrave të Votimit, për hedhjen e votës e deri në mbylljen e tyre, i shqiptohet gjoja subjektit politik që është i përfaqësuar në Kuvendin e Republikës së Kosovës dënohet me gjashtëmijë e pesëqind (6, 500) euro, deri me njëzetepesëmijë (25.000) euro”.*

Paneli, me rastin e shqiptimit të gjobës si në dispozitiv të këtij vendimi, u mbështet në dispozitat e lart cituara, e në veçanti duke marr parasysh rrethanat e rastit siç janë:

- Natyra e shkeljes dhe ndikimit të mundshëm të saj, në procesin zgjedhor;
- Shkallën dhe peshën e shkeljes;
- Faktin se subjekti politik të cilit i është shqiptuar gjoja Lëvizja Vetëvendosje, ka marrë pjesë në zgjedhjet e mëparshme,
- Shumën e fondeve të marra nga subjekti politik prej Buxhetit të Republikës së Kosovës, për zhvillimin e aktiviteteve të lidhura me fushatën zgjedhore.

Paneli, vlerëson se gjoja e shqiptuar si masë, përveç aspektit të dënimit në raport me subjektin që nuk e ka respektuar Kodin e Mirësjelljes, shërben edhe si masë preventive që në të ardhmen subjektet politike të përmbahen nga veprimet e tilla që bien ndesh me rregullativën ligjore, që cenojnë të drejtën apo lirinë e votimit, në mënyrë që të sigurohet klimë e qetë dhe e përshtatshme për votim të lirë dhe të pa ndikuar si bazament i një procesi demokratik zgjedhor.

Nëse subjekti të cilit i është shqiptuar dënimi nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do ti shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: *“ 120.2 Dështimi për të paguar dënimin apo për t’ju bindur një urdhërese të PZAP-it brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i.”*, ashtu siç është vendosur në dispozitiv të këtij vendimi.

Paneli Zgjedhor për Ankesa dhe Parashtrës

Anr.439/2021 më datën 16.02.2021

Kryesuesi i Panelit
Ferki Xhaferi



Këshillë Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda njëzetekatër (24) orëve nga momenti i marrjes-pranimimit të këtij vendimi.